

YËSSE CROQUE-MÔRT, PARËT!

Nin onk qu'èst chômeû. Il ont tortos dèl bèsogne. Di l'èsté come di l'uviêr, dîmègnes èt djoûs d' fiesses, i sont todi su tchamps su vôyes. Tofêr moussîs à gayètes, cès-omes-la ... èt i l's-î faut co fé one tièsse d'ètèrmint. Non.na, c'èst po d' bon. C'èst l' mèsî qui vout ça. Què v'loz.

Maîs ni v's-î fîoz nin, savoz. I n' vos faureut nin aler pinser qu' cès djins-la ni sépenut rîre come tot l' monde. Dji v's-è va conter saquantes qui dj' tin dès parints dau Djan.

Vo-lès-la, on djoû arivés po-z-aler èssèveli one mwate. Çu qu'on nè l's-î aveut nin dit, c'èst qui l' comére èsteut au trwèzinme plantchî sins pont d' monte-èt-d'chinde èt qu'èle fieut dins lès 150 kulos. Tot paf nos-omes. Qui faleut-i fé? I l's-î faleut trover on plan. *"Choûte bin, là, Djôsèf, twè qu'a dès grandès spales, mi, dji n' veu qu'one sôrte à fé. Dji t' va atèler come nosse Mirza èt t' n'aurès pus qu'à yèrtchî l' comére dins lès montéyes"*. Çu qu'aveut stî dit aveut stî fait. Maleûreusement, gn-aveut one aroke di pus. Dins lès montéyes do deûzinme plantchî, gn-aveut on d'gré qu'èsteut foû sqwêre èt, come di jusse, nosse Djôsèf n'aveut rin vèyu, tot ocupé qu' 'l èsteut avou l' comére. C'è-st-insi qu'il a ridé j'qu'à l' valéye avou s' kèdje èt rîre come on bossu. Gn-a d' ça mwints-ans maîs sès fèsses èt s' dos s'è sovègnenut co audjoûrdu.

Li lèdmwin, c'èst por on-ome qu'on lès vint uker. Il avin.n' à pwin.ne tot fait qu'one masse di djins ariveut d'dja. Lès prumîs n'avin.n' nin co dit tote one pâtêr qui l' lampe qu'èsteut au d'zeû do vacha c'mince à balziner èt s' distinde. *"Va qwé l' chalète qu'èst dins nosse camionète, Djan. Èt, dji t' va dîre, cès djins-la ont brâmint dèl chance ... li feume m'aveut justumint d'mandé d'aler au Brico lî acheter dès novèlès lampes ... prind-z-è one avou"*. Djôsèf gripe su li p'tite chaule èt candjî l' lampe. Maîs, tot d'on còp, i pièd balance èt tchaîr dissu l' mwârt. C'èst rade qu'il a stî r'drèssî èt 'nn'aler. Sbaré èt tot cacame. Vos dîre qu'i n'ont nin rî zèls deûs en-z-è ralang sèreut minti.

Li sèmedi, djoû d'ètèrmint. Ci djoû-la, Djan èt Djôsèf ont rî à tchaîr mwârt d'astampé. One vîye matante qu'aveut todi dit qu'èle v'leut riv'nu dins s' viladje. Lès nèveûs l'avin.n' pris è leû maujone èt l' wiyî dins l' bèle place. C'èsteut d' l'uviêr. À l'uch i fieut one frèdeû d' diâle. Minme li tchèt n'î aureut seû d'mèrer. Il a rintré èt wiyî l' mwate avou sès djins. Bin oyi, ça. Èt come i-gn-aveut dès fleûrs di tos lès costés, i s'a bin amûsé. Li mimôsa, qué plaîji vos-ôtes! On p'tit còp d' pate à gauche, on p'tit còp à drwète ... Li nèveûse ènn'a yeû s' sô tot l' minme. Èlle a stî qwé one miète d'amougnî po rawè l' tchèt è l' cûjène. Maîs bèrrique. Li p'tite ârsouye s'a stî catchî pad'zo l' bî. Li comére s'ènondeut. Èle ni saveut pus qwè fé. Po fini, èlle a mètu l'assiète d'amougnî pad'zo ossi èt l'avancî, èt l' ravancî. Pont d' chance non pus. Li tchèt n'a nin boudjî. Adon, on s'a stî coutchî saquants-eûres po yèsse d'assène po l'ètèrmint. Èt l' sèmedi au matin, quand l' Djan èt l' Djôsèf ènn'ont 'nn'alé avou l' vacha èt rôster lès draperîyes, surprîje. Ils ont vèyu on nwâr marou què lès r'waîteut avou deûs-ouys d' oûlote. Il èsteut guèdé maîs i n'aveut nin co fé l' bagadje. Li p'tite assiète n'aveut nin r'trové s' place è l' drèsse èt i d'mèreut one miète di *Félix* al tère.

Dès djoûs qu'i-gn-a, i-gn-a à rîre, vèyo, quand on-z-è croque-môrt.

A.-M. FRANCOIS